



滇
繫

ル 5
3254
35



門 儿 5
3254
35

天
地
人
三才


西
圖
十
八
十

天
地
人
圖

六
十
七
年
春
月
日


古西域諸國

西



北

東



昆明陸智摹繪

滇繫書目

土司一冊上

雲南府 七

大理府 廿六

臨安府 十七

永昌府 四十

楚雄府 十八

曲靖府 八

趙州師 範荔屏纂輯



滇繫 九之一

土司目錄

激江府 四

蒙化府 二

鶴慶府 七

姚安府 二

廣西府 四

尋甸府 三

武定府 三

景東府 五

元江府 一

麗江府 五

廣南府 二

順甯府 五

永甯府 一

鎮沅府 一

北勝州 四

倪蛻土官說 劉彬土司論 明史土司傳

滇繫

土司繫

趙州師 範荔扉纂輯

雲南府

昆明縣赤水鵬巡檢司土官阿刺馬丹洪武中从劉侍郎使車
 里後从征陣亡錄其子馬速魯麻爲巡檢訟至馬時升襲
 清水江巡檢司土官李保永樂中以通事譯夷語宣諭八百諸
 酋授巡檢洪熙中有李賢者入貢襲以勅諭進將仕佐郎後沿
 至李國柱襲其地控昆富二邑之交武夷累犯諸城恆拒之李
 氏所轄地方有箴浪九村

滇繫

九之二

土司

羅次縣土官楊大用甯州人洪武中歸附潁川侯錄其功表爲景東府知事累官右參議其後有楊正者自請錄用初爲上江鄧川之巡檢後調楚雄之沙楊尋授羅次土知縣世其官宋魯安銓那鑑之亂咸征其部兵至五百而止

煉象關巡檢司土官李煊本縣昆石鄉夷人初仕元爲防送干戶洪武中率象從征沒于陣錄其子李阿白爲土巡檢宏治中銓注煉象官兵討武定鳳氏及他役李氏咸以兵從多或至二百人

安甯州土官董通洪武中率衆從傅潁川爲向導供資糧後元遺孽作亂保境通拒之乃錄其子董節奉訓大夫安甯鎮土知州設流以來政歸有司每征調則倩鄉民充行伍後泐至應襲董九成

祿豐縣南平關巡檢司土官李矣洪武中以甲首宣諭收招各酋授巡檢阿克之變有李印者死于陣

宜良縣湯池巡檢司土官馬坂以通事屢偕諸使人入三宣後又導諸夷貢方物正統中以其子馬祺爲巡檢从諸夷酋之請也鳳繼祖之亂發其兵三百人後以莪甸不靖又征其衆戍昆陽

大理府

鄧川州土官阿這羊塘里民洪武十五年蠻賊高生與故元右丞普顏篤之亂惟這執忠不屈爲西平侯所旌後以擒高生等功授土知州世襲所部皆以强者依山弱者半附郭嘉靖中阿國禎以兵一千奉調征安鳳後又以兵一千从督府鄒公蕩赤石崖論功欽賚得如例萬厯中阿榮以八百衆護餉征岳罕建隴川土城又以六百人剿捕尋甸賊李賢輩其後矣堵蠻罕五并諸役咸在行間稱用命焉

青索鼻巡檢司土官楊良波湖邑里人爲元蒙化州判官明兵

克大理歸附招叛民累功土巡檢所部兵不滿百每鄧川出兵則楊氏以所部从

浪穹縣土官王葯師初以芻粟餉大軍授鄧川州吏目後以征普賢篤功改浪穹典史世襲官兵討鐵嶺等及米魯武尋咸以兵从阿氏備一隊後公至王夢祖冠帶管事天啟壬戌霑益亂亦調其衆犒以銀牌

蒲陀崆巡檢司土官楊順浪穹縣坊長里民洪武中指揮周能署大理衛事以順充通事招撫蒙化白崖傅穎川表爲土巡檢其後屢从阿氏建功

鳳羽鄉巡檢司土官尹勝鄧川州玉泉鄉人元末爲木邦府判明兵克大理歸命軍門西平檄授土巡檢安鳳之亂从阿氏攻李瑣飛李牙保等砦

上江背巡檢司土官楊信劍川州人初爲村長以芻粟餽明軍後累功官于三營佛光甯北之間授世襲土巡檢常从阿氏討

下江背巡檢司土官何海浪甯山後里人倡義率土民歸順授土巡檢世有其職

把事張心浪甯甯北鄉人方明兵入界特招集鄉民歸附餽糧

無乏錫冠裳以之把事鈴其衆后安鳳收甸鐵鎖等各役咸効駟馳稱勇敢焉後征隴川耿馬調集或至三百人沿至張軫聽

襲

定西嶺巡檢司土官李清字趙州彌只里人元爲彌只防戶洪武中歸附授土巡檢沿至李齊月襲其部夷量土而畊納信不爽从未聞征戰之役

德勝關驛土官王義太和縣人國初附大將軍招集高奴李珠等五百人授驛丞

洱西驛土官張鑒元時爲提舉率衆來歸屬于指揮周能獲故

元左丞伯都督等又築外城累勞授驛丞

雲南縣土官楊奴在城棘夷元時典邑以縣降授土縣丞初僉
土兵一千五百名其後麓川蠻莫木邦尋武威効行間多至六
百名以上後阿克楊禮叛其部所向克捷大略皆徒跣裹氈無
部伍其長技以勁弩毒矢爲迤西諸夷所憚居平與洱海衛軍
襍耕相安沿至楊如檀得以鄉賢从祀沿其子楊琪襲

張興阜民鄉七百莊棘民元爲品甸千戶所土官明軍至楚雄
興首効順爲指揮脫列伯向導至品甸招諭甸民歸附者累千
以甲馬獻後又攻石砦有功授土主簿世襲與楊氏分土而居

順大之役征其兵五百名鄭舉之役三百名

楚場巡檢司土官楊波日元右丞不花顏之裔洪武中選爲百
夫長造金沙渡船及築城運鹽累功勞充冠帶把事卒子木嗣
木卒子僧壽嗣壽有武勇从征麓川佛光蒲窩鎮康累功給勘
合管辦巡檢司事尋具奏實授土巡檢後東川武定鐵索諸役
戮力行陣或護餉餽軍

爾甸巡檢司土官李義本甸棘民明初招故元左丞李砦右丞
賽因帖木兒不花大王搦思鑒俱聽命論功授土官巡檢後泐
至李尚聽襲

安南坡巡檢司土官李納令趙州人洪武中招白崖頭目高添位等戶口五百均歸附授土巡檢

雲南驛土官袁奴雲南縣站戶夔人洪武中招故元同知自羌萬戶自白及本處夷人三百戶歸附後又以餽糧累功授土驛丞至征麓川調其兵二百是後本縣土官楊氏奉令討叛袁氏皆以所部从

賓川州賓居巡檢司土官董本太和縣城北廂里人元時順甯司經歷以象馬來降授大理經歷泐至董祿降土巡檢後董鑒以兵二百從征鳳朝文

金沙江巡檢司土官得力玉石昆明人从明軍攻烏撒金齒累功授曲靖阿幢橋巡檢給田調金沙江後累劾戰功于武尋赤石崖然其眾不滿百

雲龍州土官段寶洪武中以州來歸授土知州泐至段綬卒子嘉龍襲其妻縱虐失夷心族舍進忠計誘漕瀾夷殺嘉龍而篡之庚申秋道府誘禽進忠械繫省城論死以其地為流官治給嘉龍子綵冠帶鈐束其眾所部夷移二種夸弱移強其三崇山後又有桎蠻鬻戾好殺

箭杆場巡檢司土官字忠元時為土官以地來歸授土巡檢與

世襲后字廷宣屢从鄧川阿國楨討安銓鳳朝文苡甸諸賊天啓初以巡司改屬雲龍州

師并巡檢司土官楊勝鄧川州玉泉鄉人洪武中率衆來歸以糧濟師授土巡檢迨楊時从征安鳳効力後泐至楊勛襲天啟初改屬雲龍

順盪井巡檢司土官李良元時管軍百戶倡衆歸義从鶴慶知府董賜入朝除土巡檢後以罪失其官尋復之苡甸安銓鳳朝文之變成以功著萬厯初从征岳鳳亦有力焉後泐至李繼武襲萬厯四十五年改隸雲龍

上五井巡檢司土官楊惠劍川州江東鄉人歸誠从戎討鄧川楊奴及佛光砦之叛授浪穹縣主簿後楊信以麓川功得世襲土巡檢又有楊世勛者从征那鑿死焉後泐至楊世恩襲萬厯四十五年改隸雲龍

十二關巡檢司土官李智鄧川州玉泉鄉人洪武中歸義授土巡檢旋又効力于苡甸尋甸間後泐至李應朝聽襲萬厯四十五年改隸雲龍

十二關長官司土官李多賽北直真定府趙州人在元爲防送千戶洪武初以招撫品甸大王及頭目自斃尋功授副長官泐

至李弼出兵一百于馬頭山攻安鳳之黨禽沙回者烏輩獻馘
李國出兵三百剿赤石崖俄喇諸砦招收阿曲明夷民百六十
餘人其後加兵蒙化大侯矣堵奉赦罕虔等皆奉調遣然其兵
多不過三百鳳克叛亦以三百人衛姚安

臨安府

甯州土官弄孫元土官普提之後洪武初歸附授土知州沿至
普奉以專橫伏法遂設流官治州事賦訟盡屬有司而征調則
土官以部夷行嘉靖中改祿姓有祿世仁者為同知祿紹先為
知府傳至祿華誥討羅平有功晉秩至運同華誥卒子厚襲厚

卒子溥襲溥卒弟洪襲石屏有祿加懋阿迷有祿加瑞蒙自則
有祿有道皆其族分出捕禦盜賊修攘夷蠻其土馬精強遵紀
律倘忠勇不替可備全滇緩急云

嶠峨縣土官普淨郡志作祿侑明初歸附授縣丞尋以功陞世襲知

縣宏治中專任流官而以土官巡捕沿其後祿崇功襲所居去
縣治五里許轄部羅窩泥二種幅員可五百里征調之衆不
滿千人

王添祥正統中以車里功升主簿傳至俊鎰錡欽皆有其官後
沿至王烈聽襲

阿迷州土官普柱洪武中爲土知州後設流錄其裔覺爲東山
巡檢司土巡檢沿至普維蕃與甯州祿氏構兵師殲焉維蕃死
子名聲幼兵道畜名聲城中令郡諸生教之旣長召諸峇夷兵
立之以延普氏名聲收集其衆勇于攻戰天啟元年十一月奉
調剿逆於其所至輒以衝陷聞

部舊村巡檢司白氏世爲土巡檢

納樓茶甸長官土司官普少羅羅人洪武歸附得授副長官傳
普定喜桂宗明微星安銓安正普鼎祿後泐至普延齡襲司治
在崇仁鄉地負白村所轄有棘夷羅羅二種部內曠場曰中場

曰鷺黃曰摩柯封閉已久而亡命逋其中竊取之

溪處甸長官司土官束充和泥人洪武中歸附授副長官其後
見于傳記者有赤渴角嵩粵成魁定魁明魁棋魁鳳海祿寬恩
貴本無姓亦不知冠帶自知府陳晟授以趙姓後沿至趙恩洪
死子趙恩禧聽襲其司又有土官錢姓者其始不可攷後泐至
錢魁泰聽襲治在左作砦村舊有部會名賀碟訛爲和泥本一
部後蠻酋官桂兄弟分爲三部溪處其一也部夷棘夷窩泥二
種

教化三部長官司土官啟乍和泥人洪武中授副長官傳至張

澤未襲土舍張得勝用事子張明襲司治在瓏村大教化衆山絡連一山中峙土官公署與民居在其巔推官江魚行部至之部夷曰馬喇曰沙人曰羅曰儂人曰野蒲曰喇記

思陀甸長官司土官遮比和泥種洪武中授副長官遮虧傳虧習虧習傳宗習傳宗白宗白傳白祥後公至土舍李泰華司治在瓦阿陀寨村落部夷皆窩泥種

虧容甸長官司土官阿普洪武中授副長官其後有阿睿甘宗後沿至孫承祖襲司治虧弓村地濕勢多瘴癘勝國安置罪人之所部夷惟光頭百夷一種

左能些石長官司土官獵豆公至龍勝安死子龍上登襲龍氏素以桀驁不聽道府鈐束每有文移輒稱都司八寨長官司屢屢戒諭其治在崇府寨高山連互崖谷之險倍于他司部夷惟窩泥一種

王弄山長官司土官阿額洪武中授副長官其後有阿乍傳至烏珀烏志得烏勝鳳死後其子有烏高舉其地層蠻幽阻魯部河自禮社江流至司境入于交趾蓋夷夏要冲云所部儂人羅獠猓鷄獠喇沙人阿成凡七種

落恐甸長官司土官他有和泥人洪武中授副長官其後有少

珪秀廷沿至陳國誥爲溪處錢覺平所殺檄元江那氏爲之處
後其子有陳汝忠司治在落恐砦部夷惟窩泥一種

諸甸皆藏匿山林羣聚雜處喜人怒獸一言不合則機弩引
弓相向死以財物償之非德化所能懷柔各長官俱本土獠
獠和泥人原無姓名各从族彙本語定名或隨其遞隨其父
名之末字更接一字以相呼宏治初知府陳晟以百家姓首
二句各分一姓加于各名之人惟納樓未受其他在郡西南
遠者不下二百里近者百里沐西平入安南蓋取道于此今
蓮花灘之外卽交夷而臨安無南面之虞者諸甸爲之蔽也

惟是流官憚瘴久而不履其地諸酋不襲而自冠且始相掎
角遂漸相傾危敢日尋干戈數十年來廣南沙儂以征戍竊
據其地窩泥弱而無謀爲所并吞官兵討之不得志各長官
寄食如樓苴耳

安南長官司正德中廢後王弄山沙伏誠子沙源萬曆三十八
年以部兵斬賊當事者委以王弄副長官事四十二年擒交南
僞勝智侯生獲阮文美等因以安南司地畀之俾阻截交路天
啟二年奉調征剿給印掌管

納更山巡檢司土官龍正和泥人成化中授土巡檢其後有龍

覺龍成龍準沿至龍統死子龍升聽龔治軍人寨禮社江自虧
容東流至此出甯遠州俗呼河底其撒果山下有壠墩渡七寶
山下有蠻板渡哈刺山下有蠻汪渡所謂納更三渡也

新化州摩沙勒巡檢司土官巡檢普傳至普榮死無嗣

新平縣南碯巡檢司土官易速傳至易體乾被殺子易儒以他事
死獄

永昌府

潞江安撫司土官安撫線氏後沿至聽龔土舍線世祿副長官
尹氏後沿至聽龔土舍尹紹堯千夫長尹氏後沿至尹祥把事

緬甸線氏後沿至額思敬線禮

鳳溪長官司土官正長官莽氏把事張氏後沿至莽成龍張世
祿聽龔

施甸長官司土官正長官莽氏後沿至莽崇德聽龔其地平行
饒沃可為郡邑部民驍悍不畏死遇戰鬪則裸跣以从鄰夷辟
之不敢犯其境

甸頭巡檢司土巡檢莽氏沿至莽瓮聽龔

水賧巡檢司土巡檢莽氏沿至莽雲龍聽龔

騰越州龍川江驛土驛丞王氏百夫長刀氏沿至王來聘刀承

爵聽襲

保山縣有十五喧二十八砦諸夷有大棘蒲人峩昌其酋長或以百夫長稱或以千夫長稱或實授百戶稱皆奉命令服徭役第性勇悍不克驟格又爲市僧所誘漸習奸僞耳今其見于尺籍者敢頂喧罕氏旱納喧線氏石冊砦施甸東山砦下騰場砦金齒東山砦甸頭砦保場砦烏邑寨七莽氏皆副千夫長也古里喧罕氏盪習喧孟氏蠻云喧早氏西牙喧線氏渡良邑砦木瓜郎寨阿思郎砦南烏砦周冊砦信邑砦瓦窰砦七莽氏北衝砦羅明砦羅古砦羅板砦四早氏潞江砦左氏皆百夫長也蠻

岡喧箒氏錦邑砦老姚砦交邑砦牛旺砦山邑砦五莽氏皆實授百戶也蒲漂砦火頭莽氏也其見于郡志以喧稱者曰蠻寬曰空廣曰蠻場曰刺倫曰蠻養上曰蠻養下以寨稱者有曰枯柯曰明邑曰茶山曰乾海子今或以它事失其官耳

永平縣土官馬氏世爲土縣丞後沿至馬一調襲又有楊氏未著其官沿至土舍楊暄其部夷素純謹每征調其衆可五百人罕岳順大諸役皆在焉近大理討段進忠亦調及之

永平驛土官李氏世爲驛丞後沿至李國臣聽襲
打牛坪驛土官楊氏世爲驛丞後沿至楊騰鳳聽襲

打牛坪巡檢司土官蒙氏世爲巡檢後沿至蒙英聽襲
右甸守禦千戶所蔣氏土官二一爲正千戶沿至蔣浪一爲副
千戶沿至蔣從智

楚雄府

鎮南州土官段氏領州同知沿至段欽

陳氏領州判官沿至陳國試

鎮西關巡檢司土官楊氏領巡檢沿至楊思

英武關巡檢司土官張氏領巡檢沿至張九思

阿雄關巡檢司土官者氏領巡檢沿至者安仁

沙橋驛土官楊氏領驛丞沿至楊儀

楚雄縣土官楊氏領縣丞沿至楊紹先

楊氏領巡檢沿至楊應雷

冠帶通事寇氏沿至寇列恂

通把李氏張氏沿至李維棟張思賢

廣通縣土官段氏領主簿沿至段一機

巡磴關巡檢司土官楊氏領巡檢沿至楊老寵

沙矣舊巡檢司土官蘇氏領巡檢沿至蘇什得

定遠縣土官李氏領主簿沿至李文

把事王氏泐至王輔

把事何氏李氏楊氏泐至何仲文李舍楊東

黑鹽井土官樊氏李氏楊氏俱領巡檢泐至樊可亨李緒楊德

隆

定邊縣土官阿氏領縣丞泐至阿天民

把事邵氏沿至邵崇仁

諸族自明初歸附授職居州縣幅員之中事權在有司居平
衣食租稅卒有疆場之事則發魚書令徵其部曲以从戎然
皆編氓也或曰羅婆或曰和泥或曰棘或曰羅州可出兵四

百人縣可二百人

曲靖府

霑益州土官安舉宗在元為曲靖宣慰司其後有祿哲明兵平

南哲妻實卜與夫弟阿哥歸附卜授烏撒府知府哥授霑益州

土知州志草作阿索傳至安九鼎世絕妻安素儀典州事因以烏撒

安紹慶繼實祿哲七世孫祿墨次子烏撒酋安雲龍弟此霑益

絕而烏撒繼也其後雲龍為烏人安國正所殺復以紹慶次子

效良為烏撒土知府此烏撒絕而霑益繼也紹慶死長子效忠

先卒泐孫安遠襲效良弟效賢娶于水西曰設科水蘭之變與

效良合其法墮落龍瓦及木洞諸營長以叛遠不能制尋死遠弟邊初贅亦佐酋婦隆氏因以繼遠而諸營陰陽于水烏間爲鄰寇邊寄空名而名士官營柵坐石龍山險阻四塞介蜀黔之境所部四十八營以勇健稱其衆三倍烏撒云

陸涼州士官阿納明初內附授知州縮州之符印焉延及資曹以功升府同知萬曆中夷婦昂氏傳其姪資世守以罪戍邊資國效應襲世居州治中部曲在強弱之間遠遜霑益

舊越州士官龍海洪武中歸附以其地爲越州以海知州事二十八年分其地屬霑益陸涼亦佐海之子阿資尋以罪誅永樂三年資之子祿甯詣闕奉貢有詔授甯土縣丞以官護之令鎮巡安插乃置之亦佐與沙氏分土而居後有海潮者以功加土州判稱舊越州沿至海現圖死妻資氏署事後土舍海現祥應襲幅員南北逕一百二十里東西倍之士馬強悍征調或至三千人武尋等亂咸調之

亦佐縣士官沙普元爲縣會長洪武初歸附世領縣事後以罪降縣丞萬曆中沙騰蛟以姪繼伯死子運泰襲運泰死妻隆氏襲居舊縣東土馬柔弱自霑烏喪亂以來益不能自振拔矣安插士官恭項初爲麓川宣慰司人明兵四十萬討思任項以

萬兵爲向導每戰先登俘思任思機妻孥八十餘衆斬夷首萬餘復發私積餉軍三月費不貲麓川既定靖遠伯請改宣慰司爲隴川宣撫司卽以項爲宣撫尙方與冠服金帶并鑄印畀之後與其下刁木立不相能搆兵焚司治項奔省城鎮巡復發大兵討之木立懼自經死朝廷以民不與恭氏而不欲泯其前功仍以宣撫司安置曲靖令世其官至今舍宣撫祖不椿沿至恭華國襲

楊光初爲騰衝守禦千戶所吏目思任屠騰衝掠光去二年餘自麓川脫歸以賊中情形來言因以金帛全小旗楊壽令結麓川百夫刁烏猛期與合兵圍賊而光先攻陶孟板殺其酋長遂與烏猛合攻江東西刁剛勁曩寨皆下之奪其浮橋大師畢濟麓川定改守禦千戶所爲指揮使司因升光爲府知事遷曲靖府

松紹關巡檢司土官李英平蠻鄉民正德中以捕盜著能麓川之役從征累功授土巡檢後以畢節夷亂从大兵解赤水圍俾世其官沿至李舒和絕南甯縣白水關巡檢司土官李檜芳以行伍从指揮李觀克大理烏撒累功授土巡檢

澂江府

路南州土官秦普洪武十七年以降附授州同知永樂中升知府普生祿祿生福福無子有女二曰元真曰慶姐相繼典州事至成化中設流遂失其官沿至土舍秦世文世澤未斬征調尚及之然皆編氓後世文死其子秦國選攝捕盜事益削弱不振故近時征調不及其屬夸皆羅羅性頑然每土官至爭迎于家擊牲以飲率婦人羅拜于下執禮甚恭殺之不怨

新興州鐵爐關巡檢司土官王爵本州白城鄉人爲通事以麓川功授巡檢以昆新之間時有阻乃建關于鐵爐關以扼其要授爵世官正嘉間礦塘通海一碗水諸賊爲亂屢征調後有王德隆亦從征鳳繼祖傳至王鑰以罪戍邊

江川縣關索嶺巡檢司土官李實本縣星雲里民宣德元年設巡司于嶺上以地險流官鮮能其職邑中公舉實因以爲土官巡檢宏治中李傳奉調征貴州香爐山之米魯福佑豆温鄉正德中征安南長官司叛夷那代

安插土官刁們俸初爲鎮康州土知州正統中大兵討麓川應募攻克上江深入灣甸後軍餉不給館穀者三月因直擣緬地獲思任思機累功升孟定府知府以其子刁班綫爲鎮康州知

州後們俸入貢如京師思氏餘孽思咲糾木邦攻鎮康殺班線
掠其金牌印信又攻孟定們俸次子刁孟不能支擊家眷奔永
昌時靖遠伯班師未久不能復征因安置們俸于澂江傳至刁
鎮國死子天廕襲

蒙化府

土官左禾蒙城鄉摩牙里人其先有左青羅者元爲順甯府同
知傳至禾爲九部火頭順甯司通事洪武中平雲南仍以禾爲
火頭後大兵征高天惠等逃竄禾遂招諭鎮化州人得授州判
官永樂中左伽嗣以兵與麓川戰于大侯功第一累升中憲大
夫臨安府知府掌州事正統中晉州爲府遂授知府後沿至左
近嵩襲職世居城北隅江內部夷柔而守紀江外數枝頗勇悍
每應征調多墊戰而無行伍

樣備驛土官尹義本府僉人洪武中從征佛光授驛丞後沿至
尹國佑聽襲

鶴慶府

土官高海其先高賜元時爲本府土千戶傳至海于明初歸附
從征佛光寨有功授千夫長世居郡城西北隅部夷附郭者馴
而柔山後烏蠻羅羅依附險阻獷悍好殺調以赴敵無所短長

沿至高玉死子高藩臣襲其以百夫長稱者則有楊通王保王
祥李清寸腸李奴王公張玉趙宗皆郡人以征佛光石門及守
城餽餉功得世其官後其裔有楊貫勛王屏王从正李得寸汝
珍李一童王霄張世立趙國瑞皆未能襲其先世之官僅以土
舍署事而已

高信郡人以資糧鎧仗从征普賢篤論功授土知事後沿至高
堂蔭聽襲

觀音山驛土官郭生本府山外民大軍征佛光助順授土驛丞
後沿至郭維藩

在城驛土官田宗郡人以芻粟供軍儲克佛光砦授土驛丞兼
高仲下把事

觀音山巡檢司土官王友山外民明初以軍功授土巡檢沿至
王之和聽襲

劍川州土官趙氏洪武初歸附尋有功授土千戶後乃沿至趙
瞻死子國麒幼族人趙睨暫攝之每征調兵皆出編民多脆弱
其以佛光討賊運餉功授百夫長者曰施保後沿至施應忠曰
李善後沿至李承恩曰趙堅後沿至趙添爵俱已襲其世官曰
楊忠後沿至楊繩夫曰楊保後沿至楊永鎮曰楊惠後沿至楊

伯春曰楊均後沿至楊受校曰楊惠後沿至揚朝儒曰段佑後沿至段聞先曰楊海後沿至楊大非曰李隆後沿至李棟俱以土舍聽襲

順州土官子與其先有曰子希元時爲世襲知州明兵平雲南以州同知待之俾東部夷後沿至子如璧襲其部曲武健每征調恆與順甯並馳爭先

姚安府

土官高壽本高泰祥之裔世居姚州元爲姚安路總管其子高寺納土歸附自久叛奪其印信虎符四年奏以高保爲土同知

後自久攻姚州殺知州田本吏目楊信保擊印奔洱海馮都督進兵討之以保爲前鋒敗賊于白鹽井救官吏熊以政等又捕賊于東山前獲僞元帥張光遠招諭民人于白石山村賊來夜擊營大敗之獲其頭目高昌漸蹙賊于馬哈山蘆頭山擒其部酋阿普楊通普只賊勢衰止遂召復業民人定租稅建城郭宮室開府治保死子孫世其官所部居崇山盡力隴畝家有常給控制番人驚悍喜鬥每奉征調不庭或至二千人遠之麓川芒部孟定豆温阿掌鳳繼祖後之隴川丁改罕岳克舉諸役皆與焉而鐵索夷箐之討自三岔河進兵衆至八千人萬歷中高金

辰以征緬功晉以四品服金辰死高光裕襲光裕死妻高宗妣攝麗江木氏女也以帷薄不修被殺子高守藩聽襲

姚州土官高義在元爲土知州子高惠明初歸附授州同知與府同知高氏同城每征調則二氏並驅其戰士可三百人後沿至高應麒麟襲

廣西府

師宗州土官阿的本州恩榮里人其先世有普思者在元爲武德將軍世有其地至的歸附授同知協州中事世居治左之恩榮若的孫曰瓏哥遂以瓏爲姓正嘉中沿至瓏節時有事于安

南邦大十八砦阿勿及武尋菽甸咸征其部二四白人萬厯中沿至瓏有光死妻妾秦氏昂氏分攝之諸夷無統紀益以恣肆後沿至瓏耿聽襲

彌勒州土官昂氏初有普德者率家向化授土知州尋升知府成化中昂貴以不法事革知府以冠帶署彌勒州住州治東食其地事在有司征調之衆以略無紀律故近不用其兵部龍鄉土舍曰昂尙才子欽在永安砦孫世英在白者鄉尙有部東仰之普世隆石洞砦之李世華俱以土舍稱祿慶里砦之龍得牙阿榮星砦之普承宗車砦之鳳鳴山俱以營長稱

維摩州土官資氏領州事設流後資高資金相繼作崇州治爲墟其後資金爲家奴所殺祀亦絕萬厯中流民李應輝據之素獷悍聲教阻絕州雖有流官僅僑寓畫諾耳

土官高仁義初爲姚安府土同知高賢族兄以兵从定西伯攻麓川上江累功姚安府照磨賢死其子高貴繼于仁義爲从子而官居其上以爲嫌因調廣西世職巡緝沿至高齊嵩死世絕仍于姚安取其親支高文啟至郡承其職

尋甸府

土官安民明初爲仁德府知府以高明馬龍二州爲美歸厚二

縣土官屬焉沿至安洋安迺相繼煽亂乃改高明爲嵩明屬雲南馬龍屬曲靖并歸厚爲美二縣爲二里改郡名尋甸設流官治之安氏降爲馬頭嘉靖初知府馬性魯以督征糧稅繫安氏餘孽安銓并其妻裸撻之銓忿激乃作亂攻破府城合府酋鳳朝文直逼省城朝廷命尙書伍公文定集大師滅其族而其屬未盡瑣面萬厯戊申阿克叛有大理保楊禮者嚮應又有阿遣馬頭龍氏亦助逆官兵討而誅之龍氏餘孽曰龍戈資頃復道水鳥諸寇走尋甸寇退就擒斬于市其他觀望懷豕心者猶費撫綏之力云

木日本麗江府土官木森子成化中與其兄木欽爭立安插尋
甸府隆萬中木遇春从征罕岳羅雄以功授千夫長沿至土舍
木可棟

易隆驛土官奄索初爲尋甸府把事洪武中从征資兵餉授土
驛丞沿至奄榮世襲

武定府

土官鳳氏其先日弄積妻高氏倡衆歸明朝授土知府正德中
弄積三世孫阿英改姓鳳潛蓄異謀其子朝文叛後孫繼祖復
捍天網巡撫尙書呂公光洵滅之疏于朝改設流官授鳳厯府

經歷以永其嗣後每朔望夷目輩咸稽首于府幕知府劉寅坐
廳事見之懼其爲後患也乃請于巡撫陳公用賓以它罪殺之
鳳氏遂絕萬厯丁未阿克自稱鳳氏之裔復捲土屠城府尋躡
省城脅取府印而去官兵四路捕之生縛獻闕下法司論罪磔
于西市其部有十八馬頭江內者漸被王化江外者接壤東川
七州砦窳盤錯雖連年數勤斧鉞而終不能以犬馬畜也壬戌
霑曲大擾有張世臣者幾構大衅雖幸就綱朽索之御猶不能無
致意云

元謀縣土官阿吾元土知縣廣哀之子本棘人種明兵南下于

金馬山歸命遂令招諭縣民得世襲授土知縣復以設流革除安銓鳳朝文之變其酋吾大用効順討賊克舉之變其裔亦以三百衆同官兵恢復縣治後吾必奎報効討霑平累功右守備金沙江巡檢司土官李安吉奴大理人初以郡尉从觀音保出降後从西平攻烏撒討永昌謀叛土同知段惠又从征越州累功巡檢後沿至李齊楠聽襲

劉保山昆明人亦以觀音保部曲歸附論烏撒永昌越州功授摩耳山巡檢司裁本司改銓金沙江沿至劉銀哥聽襲

景東府

土官俄陶本府人其先有阿只魯在元爲景東土知府統威遠州及案井母龍猛統阿寵三甸賜以金牌印信陶仍其職洪武大兵至楚雄以通事阿哀从軍納款大理旣平遣大指揮宣諭景東陶遂與之俱至楚雄獻鎧仗馬匹并元所給牌印因以陶爲景東府知府頒印世其職後與思可戰不敵奔白崖以奏章請于朝調神策衛鎮其地是爲景東衛乃漸以流官縮符蒞之尋頒賜金帶上鐫誠心報國四字及銀幣甚厚令通政司經歷楊大用賜陶陶死子陶幹嗣後乃世姓陶沿至陶瓚偕景東衛官兵攻麓川者章羽牙殺奉撒等晉大中大夫資治少尹其祖

母阿曩太淑人沿至陶金以罪稽其襲會者樂旬刀儀刀重構兵奪印去金以兵攻之斬刀儀得其印以歸乃令陶金襲後沿至陶明卿其部棘夷性本馴朴而流民通其中兵習弩射以象助威自鐵索米魯那鑑安銓阿堂以及鳳繼祖烏撒諸役咸發其戰象夷兵先年每調兵二千必自効千餘餉士之費未嘗仰給公家今不然矣

姜固宗鎮南州人先以把事隨阿哀輩齎金牌印信降尋以象馬入貢以从馬都督攻磔嘉功得冠帶卒子姜嵩宣德中設猛緬正長官復改本府知事遂世其官凡發陶氏象兵姜氏咸以

服屬从

楊勝本府人世爲把事宣德中屢以麓川餽餉及者章洞牙功得冠帶宏治中改三岔河哨爲巡檢以當寇賊之冲也勝之裔司其干陬後又以一碗水九窰坡二哨多寇并責楊氏鈐之後沿至楊立程襲

陶暹本府人初爲頭目招岡宣德中貢象入京銓保定巡檢又从征馬龍他郎甸者章羽牙砦累功縣丞後世世爲巡檢陶氏奉調出師暹之子孫咸在焉

阿寨初爲俄羅鋪村頭以諳夷語送迎得賓旅心授板橋驛土

驛丞左右流官賽死子阿哀嗣哀死子哀徐嗣徐死子雲漢嗣
遂以雲爲姓

元江府

土官那氏明洪武初那中率衆歸附授世襲土知府尋設流官
興學校嘉靖中那鑑爭立篡殺爲亂布政徐樾率諸路兵討之
鑑毒江上流人馬飲之卽死師少却縱象馬躡我兵徐公中流
矢卒鑑懼而自殺遂革其官收印信令臨安衛指揮一人往署
之而印猶懸那氏之家每官書移白指揮取其印必以夷兵蜂
擁環伺之署訖復引去後大酋那天福鑑之孫也篡兄自立其

地左環禮社右浸瀾滄鎮以寶山蒙樂天時兩熟帶甲萬餘然
熨夷懦而畏寒唯安其土不便征繕惟是流官僑寓統袴代割
以致威德梗之士酋雖停襲故傲焉雄長也

麗江府

土官木得在元爲麗江宣撫司副使明朝洪武初入貢歸附後
以克石門寨論功授世官爲土知府又從吉安侯征巨津捕阿
奴聰于吐蕃斬僞元帥朱保及西平征景東定邊咸在行間得
死子初襲值白交山及僞平章貢哈喇麓川思任之亂咸有戰
功其後世居西陲捍吐番每有征調則輸軍餉而兵不出沿八

世至木增代有錫予增在任值北勝會構亂以兵擒首逆高闕
又值遼左軍興輸餉二萬于大司農殿宮鼎建亦輸金于京師
陳言十事下部議可朝廷嘉其忠誠特與晉參政兼賜璽書榮
其先世尋請老子歎襲
木日本府人以統兵从征麓川累功授本府照磨沿至木苴刺
未襲而死世絕

通安州土官高賜鶴慶人在元爲義兵萬戶侯洪武十五年大兵
平南賜从征佛光砦招諭未附者以軍儲餉大師授通安州同
知沿至高元襲元死高岑以土舍護州印聽襲

蘭州土官羅克本州人亦仕元爲萬戶明洪武中率衆來歸以
軍功授土知州其後有羅才者從木初征伯夷刀干孟亦著戰
功沿至羅萬象襲萬象死羅燦以土舍護州印未經承襲

巨津寶山二州原無土官巨津有流官知州寶山有吏目俱不
入其地俸入取給于土府人民服屬于木氏

廣南府

土官儂郎恐元時爲宣撫有二子長不花次禎祐不花生儂郎
舉明兵南下歸附授土同知死無嗣禎祐襲後以他事罹罪死
洪武二十九年鎮守臣請官其子儂郎舉高皇帝曰儂禎祐犯

事在大赦已前饒他兒子儂郎舉土人你們既保他也好吏部
行文著他知道等他來朝時與他職至仁廟時鎮臣具疏再
請得旨准沐國公說著儂郎舉管廣南府通判職事郎舉死子
印龍襲正統中以征麓川功升同知嘉靖中儂承恩从征元江
殿後有功死無嗣四門族舍目兵百姓咸推儂文舉以冠帶署
事阿堂之役率兵三千助征鳳繼祖別者龍之討皆以功獎其
後征阿底亦以功著萬曆七年遂實授同知後征罕岳亦建功
焉文舉死子應祖繼二十一年兵征三鄉應祖親獲叛首阿機
魯拆阿則俘于軍門欽賞白鏹百鎰二十八年征播徵其兵二

千授之職三十六年征尋甸叛目獲大理保楊理旌四品之服
應祖死子紹周襲自禎祐伏法設流官儂氏之澤斬矣郎舉得
襲實四門舍目之力故至今沿爲例凡儂氏替襲必由之士官
之政出四門租稅僅取十之一矣士官貧弱以此地險瘴惡知府
不至其地郡篆以臨安衛指揮官一人署之指揮以他事遠出
則篆亦潛封一室土酋取入其宅必有疫瘟死亡萬曆末年儂
紹湯爭立糾交趾兵衆入郡焚掠一空數年瘡痍未甦

富州士官沈郎先元時爲富州安甯二州士官子沈永秀梁王
署爲元帥洪武中永秀令通事何容等呈平西侯送款給以文

書令守州土永秀死沈大忠嗣守邊有功西平請于朝授以知府其後子孫微弱不能襲多以土舍護印萬厯初沈仁挈印逃奔泗城委官勘處竟未歸有沈銳者取其印以歸沿至沈世祿世祿死明通繼

順甯府

土官猛闕明初歸附授知府六傳至猛廷瑞于紀罹法遂設流官

雲州土官奉氏其先从靖遠伯建功世爲大侯州知州沿至萬厯中有奉赦奉學分兩署自號上下二衙學居下衙不受制于

燕惟恃女夫廷瑞據雲夢頻年構兵萬厯二十五年討平之議以雲夢置新州而赦守大侯如故赦之子奉先不樂設流與其族猛麻奉貢構兵抗命三十六年再征之朝命改州爲今名猶官奉先子國恩爲土州判

猛甸長官司土官其先不可考萬厯二十一年刁奉歷遣人上書自言其祖奉和曾從王尙書軍功授長官今自願納糧乞冠帶當事者从其請奉歷死子奉升肆虐爲頭目奉墮所殺弟奉鼎奉新爭立鼎奔孟連新恃耿馬而木邦猛猛从中弄兵巡撫周嘉謨檄金騰道爲之解紛令鼎新分食其地而以陶氏護印

猛猛巡檢司土官奉正萬曆二十七年題授土巡檢

猛撒巡檢司土官罕存與奉正同授巡檢

謝公滇略曰猛猛撒猛緬所謂三猛也附近順甯而猛猛最爲強勅部落萬人其酋時與二猛爲難境內田少菁多射獵爲生猛緬地雖廣桡而民柔怯酋長忠順猛撒微弱近折而入耿馬矣

永甯府

土官卜都各吉洪武中以故元永甯州部民來歸授土知州死子各吉八合嗣永樂三年率香羅革甸瓦魯之刺次和四部番

夷火頭板必他布郎結分阿只苴等入朝上嘉之陞永甯爲府授各吉八合中順大夫賜銀金花帶鐫四字曰克篤忠誠更以香羅革甸瓦魯之刺次和爲長官司授板必他等副長官後八吉老疾替襲于其子卜撒爲四川鹽井土官刺馬非所侵父子俱被殺卜撒妻訴于鎮守三司逮刺馬非解赴京道卒因疆理其地以下撒弟南入嗣其職正統中鹽井諸酋侵據之土官不能制乃請設流官同知經歷以共治寄署于瀾滄衛握郡符遙制之其地密邇麗江故數以侵漁爲辭然永麗以金沙江爲界畫地而處原自分明經幕府委勘後爭端稍息後在永甯稱土

知府曰阿銓

鎮沅府

土官刁平其先有中旺者仕元爲元江路總管洪武中傳至平與兄那直率衆歸附有旨元江練兵聽調中旺自任出民兵四千以那直子榮辦府事而令刁平掌兵聽調遂以西平之請授千夫長後領兵招諭六谷三十六砦諭其火頭沙羨等出官任差發因令鈴束後剿刁猛混及猛漢遣定案板等砦設鎮沅州以平典州事永樂中從征八百又從內官都術楊安趙忠等攻石崖者達砦外夷正線來降又以方物入貢詔升鎮沅爲府平

以知府領之其後子孫多以冠帶署事嘉靖中傳至刁甯息奉調以兵征安銓者一千人其子刁仁奏勘准襲復以兵一千征那鑑克魚復砦據之其後互爲吞并之志初鎮沅印爲那氏所奪于是始得獻藩司乃令經歷劉廷秀給之刁仁焉旋沿至刁明奏襲

北勝州

土官高斌祥本州四城鄉彝夷人任元北勝土府知府累官雲南行省右丞洪武中以北勝地在邊徼改府爲州二十三年晉府同知斌祥子高策以軍功授知州其後高果征麓川功高崙

以征安鳳功加階朝列大夫高世懋以征順大功亦加至四品服世懋死其族高蘭以罪伏誅

章吉帖木兒世爲元北勝土知府明兵克大理以部民及順州民人來降并納所握印及麗江宣撫司印三珠虎符西平令其子章觀音奴从軍兵逃于伍乃殺其爵爲州同知與高翌州治左右其兵蓬跣无部伍而裹氈而戰悍勁不辟衝突木弩葯矢是其長技

浪渠州土官阿的洪武初以夸兵歸附从征西平奏授土知州屬于瀾滄衛其后有阿朝佐者征鳳繼祖斬其部酋普右者樂輩以功稱首及征鐵索等老姚關順甯武定咸發其所部番兵五六百衆往輒有功

者樂甸長官司土官刁氏洪武末內附領司事其土地山險多瘴介于鎮沅元江景東之間日事攻戰鎧城犀利兵寡而勁諸夸咸憚之

範按顧甯人合舊志志草所志內地土司一百三十六邊外者二十有三則志之屬夷茲據乾隆新志並永昌騰越二志互相參訂邊外者尙二十一戶撒臘撒係乾隆間增設而孟連蠻莫木邦猛密孟養車里老撾八百俱附于緬其在內地

者僅五十一 國初迄今百六十年誅夷裁革故絕已過其半夫土司之授職或自元或自明小者視子男大者竟數倍于公侯黃帝分封萬國有以哉乃昔賢謂井田變而阡陌封建變而郡縣三代之治不能復覩予則以爲不然蓋各土司之喜人怒獸皆世職有以致之前筠浦參知師撫滇日子擬上裁汰土司議而師已移江蘇遂不果今得劉倪二作錄之上卷末俾證予言非謬並分新錄者爲下卷以俟後之秉筆者擇焉嘉慶丙寅中秋

昆明倪蛻土官說

邊徼多土官子孫世守當漢唐宋時無分流土而其銓敘轉遷稍稍殊焉自元及明分流判然矣滇土官大小俱備漸就裁改所存無幾而世每謂土官家爭殺淫縱之爲悉屬邊蠻沴氣天固不與之以善性者芟夸而刈殺之宜也雖然世祿之家鮮克由禮春秋二百四十二年左傳所載諸侯卿大夫家事豈不有甚於今日土官家所爲者齊魯鄭衛豈是邊蠻而其驕淫殺奪無所不有蓋非太公康叔貽謀之不善亦封建世官之流弊必至於此極者也故譏秦之廢封建而立郡縣爲非計者誠迂儒矣然而雲南內地土官消磨亦易暴橫不法者參劾而去之老

病死亡者停襲而免之苟有賢者薦而達之與流官一體陞遷
如此二十年而土官皆可以盡既不利其所有而起意驅除又
不坐之無名而恣情斬殺春秋代謝一循天則之自然又何有
恩怨之得生於其間哉獨是相鄰交緬各司仍須羈縻繫屬不
宜輕有改更亦非謂其尾大不掉而虞之也特以地居荒遠瘴
癘特甚設流官不諳風土立防兵難免瘴病運糧米又恐勞民
卽其渠帥而用之此固諸葛武侯經營簡易之宏謨也

永北劉彬永昌土司論

天下惟滇夷最多種類色目殆數十餘而附於永昌者居其大
半其先皆各居其地自相君長或有仇殺亦以夷陵夷未敢犯
我中華自元命劉深擊八百媳婦無功而回外國始有輕中國
之心於是燒案牘掠百姓終元之世討緬者再討八百媳婦者
再僅能分設宣慰邊境粗安而已明時鴛鴦尤甚思可思任思
機刀幹孟罕拔岳鳳莽瑞體思仁丙側莽應鯉等後先釀禍擾
我疆土屠我城池殺我將士逞兇肆毒了無顧忌卒至勞師動
衆財殫力痛數征之而後定向非有王驩楊甯侯璉沐晟及劉
世曾陳用賓諸公之運籌慎重李材許天琦羅汝芳胡心得漆
文昌諸公之智謀膽略蔣貴方政劉綎鄧子龍吳顯忠董獻策

滇縣
劉天俸諸公之義勇忠勤相繼宣勞効力於其間則西洱昆明
幾何而不爲緬人洗馬池洗象池耶嗚呼蠻夷之禍自古有之
揆厥所由非激於誅求卽逼於凌虐或有蠢酋妄動狡焉啟疆
始則防禦不慎繼而剿撫失宜熒熒不滅遂至燎原此皆已然
之勢論者固未可執一而觀治者尤當因時而變何況今日彝
困於腹削日益貧窮習於風氣日益刁詐更非向日之彝可比
不獨一永郡爲然也余以纂修永志姑卽永郡之彝論之有內
地之彝有外地之彝有沿邊之彝有雖在沿邊而實同於內地
之彝內地者如永平之土縣丞土驛丞保山之潞江安撫司是

也此皆地界通衢境連郊邑井閭相望阡陌相錯與漢人雜處
而居者也沿邊者如鎮康灣甸芒市遮放蓋達猛卯干崖隴川
是也此則環永騰西南北鄰江域奉節制供差發者也其西北
之沿邊者漕澗上江此外卽爲茶山里麻古勇野人等夷雖有
節制之名而已非我部屬儼然外地野人則並非控制赤髮野
人又在野人之外矣雖在沿邊而實同於內地者如騰越之南
甸司保山之十五喧二十六寨是也其境界相連田里相雜猶
夫永平之土縣丞土驛丞保山之潞江安撫司也外地者如威
遠孟連耿馬等彝是也此則雖在控馭直隸之內不過供差發

屬羈縻而已法令所不及也又其外如緬甸車里八百老撾木
邦孟艮猛密緬蠻莫蓋西鈕兀諸彝其土地之廣有數千里
者千餘里者數百里者大小不一強弱攸殊各長其長各世其
世此則地廣勢厚最著名於諸夷中者也其他雜小夷人未易
指計若此數者之中緬最强車里八百木邦次之老撾猛密孟
艮蠻莫鈕兀又次之然吾所爲致論者不在外地之夷而在沿
邊之夷與內地之夷與雖在沿邊而實同於內地之夷何也外
地者誅求不能及凌虐不克施隙釁之起旣無其由而況時當
全盛彼諸夷又豈敢有不逞之念哉若沿邊之彝內地之彝雖

在沿邊而實同於內地之彝則不然其地最近勢最柔故其爲
累也最苦爲禍也最易爲惡也又最深以彼區區一土司人之
視之者特蠢茲夷人耳狎而易之也誅求者有矣久而不繼凌
虐者有矣甲來而施之可也乙來而施之亦可也施之施之難
乎其爲受者矣故曰其爲累也最苦也至若狡悍鷙刻又其本
性或激於一念或畜於平時變起倉皇出於不意呼吸之間卽
受其禍雖有智者能預爲之防乎又或憑崎負險劫掠中道一
落深箐散入萬山展轉道途卽覲面而不知其爲盜捕緝固不
可得行杳僅屬虛文故曰其爲禍最易也而猶未睹其惡也彼

之官世官也被之民世民也田產子女唯其所欲苦樂安危惟其所主草菅人命若兒戲然莫敢有咨嗟嘆息於其側者以其世官世民不得於父必得於子於孫且數倍蓰故死則死耳無敢與較者嗟此夷民何辜而罹此慘耶漢人苦於所司動輒鳴於上官此則不敢鳴即鳴之矣彼固有所恃而不恐歲時饋獻不過差目具文一有提調則閉匿深藏負嵎以待其洋洋然山頭望廷尉良以平日無事寬容太過及其有事雖有譴罰之名曾無懲創之實彼固視爲故事自謂土官世職莫可如何以致驕縱滋蔓尾大不掉所由肆屠虐而不悛玩法紀若罔聞者故

曰其爲惡最深也嗚呼其惡宜除也其禍宜防也其苦宜恤也往者滇省常受其害如阿資鳳繼祖阿克普名聲吾必奎猛庭瑞莽應龍沙定洲輩一夫作難全省震蕩前車已覆後車不戒豈非以其固結已久黨類實繁猝難遽去且地方守令鎮防將弁莫不利其蠢懦留爲魚肉之資誰肯輕言去之者曩歲曾有疏請裁革行令各省查議乃有司鎮將或受其賄賂或徂於私情僉言不宜裁革而止嗚呼果盡不宜裁革乎蓋前疏內於土夷情形猶未透悉故於何者宜去何者宜留未知分晰議者遂得以徇私混復溺偏見而阻大計莫甚于此竊以爲在內地之

土司可裁也雖在沿邊而實同於內地之土司亦可裁也宋祖
云臥榻之旁豈容他人鼾睡顧使侏僂異類深根固蒂分踞郡
縣中豈國家久安長治之善策乎且攷此輩先人受職之始皆
非有開疆辟土不世之勳治亂扶危非常之績也夫茅土分封
河山結誓猶有不能保其終者此輩何功何德反得子孫世守
其官世虐其民匪但宗藩世祿所不能及元明迄今已六百餘
年而彼不移安然坐享不朽之業揆厥由來則去之宜也非過
也或者謂夷人鳥語卉服習俗攸殊爰置土司統之所以藉其
保固藩籬之用而奈何去之是殆不然夷民種類雖別而畏威

懼法之心與舍苦就樂之情則一苟善撫之疇非赤子就滇而
論從前皆夷也而今之城郭人民風俗衣冠改土歸流變夷爲
夏者十且八九未聞必藉土司而後保固也若所謂藩籬者乃
邊境之外者也豈有在內地者而亦藉以爲藩籬乎或者又謂
彝人在內地者雖屬土官管轄土官仍屬流官節制比於子民
相安已久何以更張爲哉此庸流淺見也籌邊之道在乎防微
保民之方貴於經久若僅泥於目前非不晏安無事而不知其
有事之機自在也且以土人言之同在中華之內而風化不能
及恩澤不克沾蓋各有土官以隔別之在流官曰此土人非我

百姓漠視之耳至於科派之重刻虐之慘則惟土官司之在流
官又曰此土人非我百姓奚預我事又漠視之耳若徭役差使
土官得以疲之者流官亦得以疲之徵求需索土官得以苛之
者流官亦得以苛之若近值營鎮之處則又加以將弁之騷擾
其苦萬狀更僕莫數嗟呼率土之濱莫非王臣乃忍令若輩人
子孫奕葉永沈淪苦海中乎救焚拯溺是誠不可緩者也雖然
若一日盡去之勢又不能必有道焉參處降調一依流官之例
倘罪應斥革卽以漢官代之停其承襲善哉令狐綯所以處宦
官者曰有罪不赦有缺不補則以漸而去耳毋務爲姑息養癰

之計而兼不失乎燥急然後錄其人民籍其田地減賦役以甦
其力給牛種以裕其源選用循良善加撫恤不出百年內地可
以肅清肘腋可以無虞使數千萬衆蚩蠢窮瘁悉得變禽獸而
隸編氓出湯火而見天日其於固邊境安夷獯豸曰小補之哉
若沿邊之土司則宜存也彼既不在我腹裏之地與我土地不
相錯雜城郭不相逼近無事則藉爲藩籬之用設或有事猶可
一面禦之非若內地者一有不虞卽在腹心之間也然非徒存
之已也必有以漸變之格其獷悍梟惡之風又必有以善撫之
作其愛戴尊親之氣禁有司鎮防之貪黷絕漢奸流棍之勾唆

隣近豪民毋使有侵漁凌侮出入賓商毋使有欺騙擾害禍患必援毋因其有事而棄之荒歉必拯毋因其被災而絕之於是申之以法使法度得以糾繩而彼知懼則其惡無敢肆嚴之以威使威令得以驅攝而彼知警則其亂何由生爲之百姓者旣獲免於荼毒爲之統馭者又不病於掣肘復爲之潛消焉默化焉仁漸焉義摩焉又養之以恩恤之以惠使彼得以生息焉久之久之鮮不爲我良民矣然後由近而推之由漸而被之舉緬甸八百郡縣之可也夫何慮於永哉噫豈獨永爲然哉全滇之士司皆然也天下之士司皆然也

補錄明史烏蒙烏撒東川鎮雄四土司傳

烏蒙烏撒東川芒部古爲竇地巴的東川大雄諸甸皆唐烏蒙裔也傳至烏蒙始強號烏蒙部宋有封烏蒙王者元初皆歸附置烏蒙路遂以東川芒部皆隸於烏蒙烏撒等處宣慰司烏撒富盛甲諸部元時嘗置軍民總管府於其地而於東川置萬戶府地勢並在蜀之東南與滇黔壤土相接皆據險阻深與中土聲教隔離明太祖旣平蜀規取雲南大師皆集於辰沅欲并翦取諸蠻以通蜀道洪武十四年十一月特遣內臣齎敕諭烏蒙烏撒諸部長曰西南諸部自古及今莫不朝貢中國朕受天命

爲天下主十有五年而烏蒙烏撒東川芒部建昌諸部長猶桀
驁不朝朕已遣征南將軍潁川侯左副將軍永昌侯右副將軍
西平侯率師往征猶恐諸部長未喻朕意故復遣內臣往諭如
悔罪向義當卽躬親來朝否則遣人入貢亟攄誠款朕當罷兵
以安黎庶爾其省之時征南將軍傅友德已分遣都督胡海洋
等帥師五萬由永甯趨烏撒矣復自率師自曲靖循格孤山而
南以通永甯之兵擣烏撒時元右丞實卜聞海洋兵至乃聚兵
赤水河以拒之及聞大軍繼進皆遁友德令諸軍築城版鋪方
具蠻寇大集友德屯兵山岡故持重以待之旣知士勇可用乃

縱兵接戰有芒部土酋率衆來援實卜與合勢鋒甚銳大軍鼓
譟而前其酋長多中槊墜馬死大軍益奮蠻衆力不支大潰斬
首三千獲馬六百匹實卜率衆遁遂城烏撒得七星關以通畢
節又克可渡河於是東川烏蒙芒部諸蠻震讐皆望風降附十
五年正月置東川烏撒烏蒙芒部諸衛指揮使司詔諭烏蒙烏
撒東川芒部諸部人民以雲南已降附宜益效順中國以享昇
平復諭烏蒙諸部長曰今置郵傳通雲南宜率土人隨其疆界
遠邇開築道路各廣十丈準古法以六十里爲一驛符至奉行
又敕征南將軍友德等曰烏蒙烏撒東川芒部諸酋長雖已降

海峽
恐大軍一還仍復嘯聚符到日悉送其長入朝又諭以貴州已
設都指揮使然地勢偏東今思莫若於實卜所居之地立司以
便控制卿其審度之四月烏撒諸蠻復叛帝諭征南將軍曰烏
撒諸蠻伺官軍散處卽有此變朕前已慮之今果然然雲南之
地如曲靖普安烏撒建昌勢在必守其東川芒部烏蒙未可遽
守也且留屯大軍蕩埽諸蠻戮其渠長乃可分兵守禦耳乃命
安陸侯吳復爲總兵平涼侯費聚副之征烏撒烏蒙諸叛蠻并
諭勿與蠻戰於關索嶺上當分兵掩襲直搗其巢使彼各奔救
其家之不暇必不敢出以抗大師俟三將軍至破禽之是月副

將軍西平侯自大理還軍會征南將軍擊烏撒七月進兵大敗
其衆斬首三萬餘級獲馬牛羊以萬計餘衆悉遁復遣兵捕擊
之復諭征南將軍以師捷之後務必戮其渠魁使之畏懼按其
餘黨絕其根株使彼智窮力屈誠心款附方可留兵鎮守也又
諭其宜乘兵勢修治道途令土酋諭其民各輸糧一石以給軍
爲持久計十六年正月以雲南所屬烏撒烏蒙芒部三府隸四
川布政使司先是烏撒諸蠻復叛傅友德等率兵討之大敗其
衆進軍按捕餘黨有潛匿者皆捕殺之諸蠻震懾相率來降至
是悉平二月烏蒙烏撒東川芒部諸部長百二十人來朝貢方

物詔各授以官賜朝服冠帶錦綺鈔錠有差其女酋則加賜珠翠首飾五月詔賜烏撒女知府實卜及烏蒙東川等知府人朝服一通并常服一襲十月芒部知府發紹烏蒙知府阿普以來朝病卒詔賜綺衣并棺殮之具遣官致祭歸其柩於家烏撒知府實卜等七百七十一人來朝詔賜織錦文綺鈔錠及把事以下從人各有差十七年五月割雲南東川府隸四川布政使司改烏撒烏蒙芒部爲軍民府而定其賦稅烏撒歲輸二萬石氈衫一千五百領烏蒙東川芒部皆歲輸八千石氈衫八百領又定茶鹽布疋易馬之數烏撒歲易馬六千五百匹烏蒙東川芒

部皆四千匹凡馬一匹給布三十疋或茶一百斤鹽如之七月以東川土官甯隆之母勝古爲其府知府十月烏撒知府實卜貢馬賜綺鈔十八年烏蒙知府亦德言蠻地刀耕火種比年霜旱疾疫民人飢窘歲輸之糧無從徵納詔悉免之二十年徵烏撒知府阿能赴京二十一年六月命西平侯沐英南征英以東川強盛據烏山路劫寨而叛罪狀已著必先進兵但其地重關複嶺上下三百餘里人跡阻絕須以大兵臨之帝命穎國公傅友德仍爲征南將軍英與陳桓爲左右副將軍率諸軍進討七月敕諭友德等言東川芒部諸夷種類皆出於囉囉厥後子姓

蕃衍各立疆場乃異其名曰東川烏撒烏蒙芒部祿肇水西無事則互起爭端有事則相爲救援若唐時閣羅鳳亡居大理唐兵追捕道經芒部諸境羣蠻聚衆據險設伏唐將不備遂墮其計以致喪師二十萬皆因將帥無謀故也今須預加防閑嚴爲之備九月烏撒軍民府葉原常獻馬三百匹米四百石於征南將軍以資軍用且願收集土兵從征英等以聞從之十月復命景川侯曹震靖甯侯葉昇等分討東川平之捕獲叛蠻五千五百三十八人二十三年烏撒土知府阿能烏蒙芒部土官各遣其子弟入監讀書二十七年烏撒知府卜穆奏霑益州屢侵其

地命沐春諭之二十八年戶部言烏撒烏蒙芒部東川歲賦氈衫不如數詔已免徵今有司仍追之宜申明從之二十九年烏蒙軍民府知府實哲貢馬及氈衫自是諸土官知府三年入朝貢以爲常三十年烏蒙軍民府署府事土官設北原遣使朝貢初烏蒙進馬賜鈔萬錠至是復來貢馬謝恩永樂間諸軍民府烏撒阿能烏蒙撒可芒部香珮各遣人貢馬賜之如故事宣德二年烏撒知府卜穆妻圓和三年東川知府阿得妻攝克芒部知府阿的子普澤皆入貢七年行在兵部侍郎王驥言四川烏蒙烏撒土官祿昭尼祿等爭地仇殺宜遣官按問八年二月豈

行人章聰侯連齋敷往諭仍敕巡按與三司官往平之三月設
烏蒙儒學教授訓導各一員以通判黃甫越言元時本府向有
學校今文廟雖存而師儒未建乞除教官選俊秀子弟入學讀
書以廣文治從之正統七年裁烏撒軍民府通判推官知事檢
校各一員十一年裁烏蒙東川知事檢校各一員并革烏撒烏
蒙遞運所景泰元年敕諭烏撒烏蒙諸府土官普茂等以貴州
諸苗叛亂恐滋蔓鄰近地方命戒嚴防守毋聽賊衆誘惑陷於
爲非倘逼近前來便當剿殺三月烏撒進萬壽表踰期部議宜
究詔以遠人宥之天順元年鎮守四川奉御陳清等奏芒部所

轄白江蠻賊千餘攻圍筠連縣治作亂敕御史項懷會鎮巡官
捕之成化元年禮部奏芒部知府朝貢過期命給半賞十年烏
蒙知府慶賀表箋不至禮部請速問帝以土官宥之十二年烏
撒知府隴舊等奏同知剛正撫字有方蠻民信服今九年秩滿
乞再任三年以慰羣望從之十七年芒部土知府遣人來朝貢
馬過期減例賞之半二十年烏撒土知府安伯關遣人貢馬三
年始至今又踰貢期乞減例賞從之宏治四年烏蒙知府祿溥
烏撒知府安得朝覲踰期請減半賞如例十三年烏撒貢復踰
期如前議減十四年烏撒所進萬壽表及千秋冬至表皆踰年

始至京禮部請罪之帝以其遠人且前後所遣遲滯皆有故宥不問是年烏撒所轄可渡河巡檢司言自閏二月二十七日大雷雨不止至二十九日水漲山崩地裂山鳴如牛吼地裂而陷湧出清泉數十派衝壞廬舍橋梁及壓死人口牲畜無算又本府呵都地方八月亦暴風雨田土渰沒二百餘處民死者二百餘人正德十一年烏蒙知府祿溥差吏把貢馬以違限減賞如例先是芒部府土舍隴政隴壽與婦支祿爭印仇殺其所部蠻蠻阿又磔者唾者鳩等乘機流劫命給事中刑部錦衣衛官各一人會撫按官議處十五年貴州參政傅習都指揮許詔督丞

甯宣撫司女土官奢爵等討擒阿又磔者唾者鳩等四十三人斬一百十九級餘黨悉平嘉靖元年東川軍民府署印舍人祿慶屢違貢期訴稱夔苗梗路不得達命減半賞下撫按官覈其事命芒部軍民府護印土舍隴壽襲知府免赴京故事土官九品以上皆保送至京乃襲是時壽與其庶弟政及兄妻支祿爭襲不敢離任鎮巡官以聞從其請初芒部土舍隴壽與隴政支祿爭立朝廷以嫡故立壽自是隴政支祿倚烏撒土舍安甯等數為亂壩底參將何卿請兵討之於是巡撫許廷光發土兵二萬五千人命貴州參將楊仁等將之受何卿節制相機進剿政

祿佯聽撫乞緩師而令賊黨阿黑等掠周泥站七星關復遣阿核等糾集諸苗剽掠畢節衛諸處殺傷官軍燬官民房屋甚衆兵部言賊勢猖獗宜速征於是何卿等進劄斬首二百餘級俘二十餘人降其衆數百政敗奔烏撒卿令烏撒土舍安甯土婦奢勿禽之安甯佯許諾久之乃以阿核那達等屍獻竟不出政兵久不解都御史湯沐以聞乃切責諸將及守巡官罪而革何卿冠帶令剿賊自贖四年隴壽爲隴政誘執殺之收其印巡撫王軌巡按劉黻各上其事黻言從蠻情立支祿便軌以隴政支祿怙終稔惡戕朝廷命吏罪不可赦帝從軌言命鎮巡官諭安

甯縛政祿及諸助惡者時政已爲官軍擒於水西追奪芒部印信前後斬獲六百七十四級生擒一百六十七人招撫白烏石等四十九寨以捷聞貴州巡按劉廷篔言烏撒衛所驗那達阿核二屍及水西所獻隴政真偽未可盡信恐首惡尚在不無後慮請覈實五年兵部奏芒部隴氏釁起蕭牆騷動兩省王師大舉始克蕩平今其本屬親支已盡無人承襲請改爲鎮雄府設流官知府統之分屬夷良毋響洛角利之地爲懷德歸化威信安靜四長官司使隴氏疏屬阿濟白壽祖保阿萬四人統之如程番府例令三年一入朝貢馬十二匹而以通判程洸爲試知

府六年芒部賊沙保等謀復土官隴氏糾眾攻陷鎮雄城執試知府程洸奪其印所殺傷數十百人洸奔畢節事聞兵科給事鄭自璧等言鎮雄初設流官蠻情未服而有司失先事之防不亟收遺裔隴勝而今沙保得擁孺子致煽禍一方宜速遣總兵何卿併力剿寇於是兵部覆言隴勝非真隴壽子故議設流官有司拊循失策遂生叛亂沙保罪不容誅當剿何卿方守松潘勢難相援宜亟趣都御史王廷相之任并救總兵牛桓調兵速進時沙保出鎮雄府印乞降然尚持兩端欲立土官如故四川撫按以保狡悍不可馴檄瀘州守備丁勇擊之又遣使勞賜芒

部撫夷卻良佐使計擒沙保保怒復叛七年川貴諸軍會剿敗沙保等擒斬三百餘級招撫蠻羅男婦以千計捷聞設鎮雄流官如舊而芒部烏撒母響苗蠻隴革等復起攻劫畢節屯堡殺掠土民紛紛見告兵部尚書李承勛以伍文定專主用兵爲失計疏及之而御史楊彝復言芒部改土易流非長策又時值荒饑小民救死不贍何能趨戰時帝亦軫念災傷令罷芒部兵俟有秋再議征討於是四川巡撫唐鳳儀言烏蒙烏撒東川諸土官故與芒部爲唇齒白芒部改流諸部內懷不平以是反者數起今懷德長官阿濟等雖自詭擒賊其心固望隴勝得一職以

存隴後臣請如宣德中復安南故事俯順輿情則不假兵而禍
源自塞川貴巡按戴金陳講等奏如鳳儀言而金又以首惡如
毋響祖保等宜剿誅以折其驕氣始下撫處之令許生獻沙保
普奴待阿濟以不死然後復隴勝故職或降爲知州其長官或
因革或分隸庶操縱得宜恩威並著章下部覆乃革鎮雄流官
知府而以芒部土舍隴勝爲通判署鎮雄府事令三年之後果
能率職奉貢准復知府舊銜制報可時嘉靖之九年四月也三
十九年命勘東川阿堂之亂初東川土知府祿慶死子位幼妻
安氏攝府事有營長阿得革頗擅權謀奪其官因先求忝安氏

不得乃縱火焚府治走武定州爲土官所殺得革子堂奔水西
賄結烏撒土官安泰入東川囚安氏奪其府印貴州宣慰安萬
銓故與祿氏姻連乃起兵攻阿堂所居寨破之堂妻阿聚攜其
幼子奔霑益州土官安九鼎萬銓脅九鼎取阿聚及幼子殺之
堂以是怨九鼎時相治兵攻擊堂兵且侵及羅雄州境於是九
鼎及祿位與羅雄土官者濬等各上書訟堂罪詔下雲貴四川
撫按官會勘於三十八年八月堂聽勘於車洪江具服罪願還
府印其向所劫霑益羅雄人口牲畜及侵地皆願補償退歸乞
貸死時位及其弟僕皆前歿官府因訊祿氏所當承襲者堂乃

以已幼子詭姓名爲祿哲以報占府印不發復與九鼎治兵相
尋益急九鼎乃訴之雲南巡撫游居敬謂堂怙亂請興兵攻討
且自詭當率所部爲前鋒必擒堂以獻居敬信之遂上疏言堂
穢惡不悛請專意進剿爲地方除害帝允部議行川貴撫按會
勘具奏居敬遽調土漢兵五萬餘進剿雲南承平久一旦兵暴
動費用不貲賦斂百出諸軍衛及有司土官舍等乘之爲姦利
遠近騷動巡按王大任言逆堂奪印謀官法所必誅第彼猶借
朝廷之印以約土蠻冒祿氏之宗以圖世職而四川之差稅辦
納以時雲貴之鄰壤未見侵越此其非叛明矣其與九鼎治兵

相攻彼此俱屬有罪居敬乃信其一偏之辭而敢違會勘之明
旨輕動大衆恐生意外患且外議藉藉謂居敬入九鼎重賄欲
爲雪怨及受各土官賂攘盜帑積皆有實迹請亟罷居敬暫停
征剿戢兵時動爲便十月命逮居敬訊之時堂聞大兵至東川
逃深箐諸將分兵於新舊等城窮搜不獲地方民夷大遭屠掠
四十年五月營長者阿易謀於堂之心腹母勒阿濟等掩殺堂
於戛來矣石之地其子阿哲就擒哲時年八歲堂所冒姓爲祿
哲謀奪土官者也於是安萬銓取東川府印而藏之以府經歷
印昇祿位妻甯著署之以照磨印昇羅雄土官者濬而以甯著

女妻者濬子仍留水西兵三千於東川爲甯著防衛水西與東川鄰萬銓本水西土官故議者謂其有陰據東川之志巡按王大人任以誅阿堂聞因言東川地方殘傷而該府三印悉爲土官相部置請通勅川貴總督及鎮巡官按究各土官私擅標置之罪并訪祿氏支派之宜立與所以處阿哲者部覆報可四十一年鑄給四川東川府印初阿堂既誅索府印不獲人疑爲安萬銓所匿及是屢勘印實亡失而祿位近派悉絕惟同六世祖有幼男阿采於是撫按官雷賀陳瓚請以采襲祿氏職姑子同知銜令甯著署掌後果能撫輯其衆仍進襲知府其新印初請更

名以防奸僞有旨不必更餘如議先是烏撒與永甯烏蒙霑益諸土官境土相連復以世戚親厚並無覺隙旣而安國亨殺死安信信兄智結永甯宣撫奢劾忠報仇彼此構禍不已而國亨部下吏目與智有親恐爲國亨殺害各帶夷兵投於安路墨路墨遂詐稱本府知府安承祖職銜赴京代奏而國亨亦令其子安民具題并奢劾忠各行奏移行所司令各照蠻俗罰牛例處分務悔禍息爭以保境安民時萬厯之六年也三十八年詔以東川土司並聽雲南節制先是巡按鄧漢疏稱蜀之東川徧處武定尋甸諸郡只隔一嶺出沒無時朝發夕至其酋長祿壽祿

哲兄弟安忍無親日尋干戈其部落以劫殺爲生不事耕作蜀
轄遼遠法紀易疏滇又非我內屬號令不行是以驕蹇成習日
無漢法情罪暴顯不可勝誅志氣既驕寇劫日甚爲今之計只
有改敕滇撫兼制東川因條三利三不足疑以進詔從之先是
四川烏撒軍民府雲南霑益州雖滇蜀異轄宗派一源明初大
軍南下祿哲之妻質卜與夫弟阿哥二人率衆歸順授質卜以
烏撒土知府授阿哥以霑益土知州其後彼絕此繼通爲一家
萬厯元年霑益女土官安素儀無嗣奏將土知府祿墨次子過
繼本州卽安紹慶也已而祿墨及長子安雲龍與其兩孫俱故

安紹慶奏欲以其次子安効良歸宗仍襲土知府安雲龍之妻
隴氏卽鎮雄女土官者氏之女也隴氏以雲龍雖故尚有遺孤
且挾外家兵力與紹慶爲敵而紹慶則以隴氏所出明係假子
亦倚霑益兵力與隴氏爲難彼此仇殺流毒一方以致士民連
名赴奏事行兩省會勘歷十四年不結是年安雲翔奏稱隴氏
有子官保今已長成効良倚父兵強圖篡據殺戮無辜又引川
南道參詞以祿哲之子孫尚衆烏撒之宗派甚明紹慶旣出繼
已明有一州暗襲兩府復極言効良不可立者數事兵部覆案
仍勅撫按議處報聞三十九年廷臣議安効良與安雲翔爭奪

職官之案行川貴諸大吏勘報而貴州撫臣又以二土官爭職在雲南而爲害在黔蜀必得三省會勘而後可定獄帝命速勘四月乃命隴鶴書承襲鎮雄土知府鶴書原名阿卜自其始祖隴飛沙獻土歸順授爲世職知府五傳而爲庶魯卜別居於果利地四傳而爲庶祿姑別居夷良七欠頭地又五傳而隴氏之正支斬矣水西安堯臣贅於祿欲奄有之久之衆論不平始有驅安立隴之奏奉旨察立隴後女官者氏以阿固應阿固者魯卜之六世孫而易名隴正名者也衆土目復欲立普德普德者阿女遺妻白則贅安糯索所生利其幼且異姓也於是主立阿

固而先立其父阿章章尋病死而阿固益不爲夷衆所服往復察勘乃從者氏請及四十八日十五火頭九擔九縱諸黨共推阿卜阿卜者祿姑之五世孫咸以爲長而且賢而者氏且以印獻遂定立阿卜而以阿固充掌衙慕魁管事從巡撫喬應星之議也四十一年先是烏撒土舍安効良與安雲翔爭立朝廷以嫡派故立効良矣而雲翔數爲亂謀逐効良焚劫烏撒四川撫按上其事以効良爲雲龍親姪雲翔乃其堂弟親疎判然効良自當立雲翔何得妄生覬覦其擾害地方欺罔朝廷罪原難赦但爲奸人指使情可原姑准復冠帶下所司議可從之四十三

年雲南巡按吳應琦言東川土官祿壽祿哲爭襲以來各縱部
衆越境劫掠前者按臣請敕滇撫兼制而二酋視之蔑如擁衆
千餘剽掠兩府浹旬之間村屯並掃荼毒未有如今日之甚者
或撫或剿廟堂自有長策毋兩地牽掣養禍日滋下所司勘奏
而貴州御史楊鶴言烏撒土官自安雲龍物故安咀與安効良
爭官奪印仇殺者二十年夷民無統盜寇蜂起堡屯焚燬行賈
梗絕者亦二十年矣是爭官奪印者蜀之土官而蹂躪糜爛者
黔之赤子也誠若改隸於黔則彈壓旣便而干戈可戢又言烏
撒者滇蜀之咽喉要地臣由普安入滇七日始達烏撒見効良

之父安紹慶據霑益當曲靖之門戶効良據烏撒又扼滇蜀之
咽喉兩雄父子各據一方且壤地相接無他郡縣上可以隔絕
鈐制之將來尾大不掉實可寒心蓋黔有可制之勢而無其權
蜀有遙制之名而無其實誠以爲隸黔中便帝命所司速議泰
昌元年雲南撫按沈敬炳等言蜀之東川業奉朝命兼制鈐束
然事權全不相關祿千鍾祿阿伽縱賊披猖爲患不已是東川
雖隸蜀而相去甚遠雖不隸滇而禍實震鄰宜特敕蜀撫按凡
遇襲替務合兩省會勘蜀察其世次滇亦按無侵犯方許起送
亦羈縻綏靜之要術也詔下所司時諸土司皆桀驁難制而烏

撒東川烏蒙鎮雄諸府地界復相錯於川滇黔楚之間統轄既分事權不一往往軼出爲諸邊害故封疆大吏紛紛陳請冀收鈐束以安邊隅而中樞之臣動諉勘報彌年經月卒無成畫以致疆事日壞播州初平永甯又叛水西煽起稱戈東川鎮雄烏蒙皆以前日助賊爲梗或觀望騎牆心懷疑貳賊又恐喝以天討之不貸言烏蒙未造反朝廷尚欲剿之何況於他於是安効良以烏撒首附逆於邦彥并力攻陸廣復與亦佐營長安應龍合霑益賊首補鮓等圍羅平陷霑益爲雲南巡撫閔洪學所敗洪學以兵力不繼好語招之令擒賊自贖効良亦佯爲恭順擒

安應龍以獻而所遣獻功之人領文還至中途被劫効良又見黔師出陸廣滇師入霑益水烏之勢已成騎虎遂合永甯水西諸部三十六營直抵霑益對壘城下五日副總兵袁善宣撫使沙源等督將士力戰出奇兵破走之未幾効良敗死妻安氏無子妾設白生其爵其祿二婦素不相能安氏居鹽倉設白母子居抱渡安氏遂代効良爲土官然亦未絕其爵其爵亦以安氏爲安位姐不敢抗安氏崇禎元年四月四川巡撫差官李友芝齎冠帶獎賞其爵母子令管烏撒安氏惡分始欲絕其爵其爵於五月十一夜襲安氏鹽倉不克與設白其祿逃匿東川界圍

東川亦不令入而抱渡又失李友芝遂誑請總督咨發滇兵三千會援其爵滇撫恐先開兵端不應事遂寢安氏以友芝其爵之請加兵也而懼謀接霑益土官安邊爲壻授烏撒以絕其爵安邊亦欲偶安氏以拒其祿以催糧爲名至建昌安氏遂接邊至鹽倉成婚曲靖一時皇皇謂水西必糾霑烏入犯雲南巡撫謝存仁以聞存仁因移鎮曲靖以觀變安邊安氏請復烏撒衛以自贖二年總督朱燮元調集漢土兵列營霑益趣滇撫會兵進烏撒境安邊安氏逃避偏橋大兵入鹽倉拔難民一千餘人師凱還安邊安氏復還鹽倉遣人至軍前請俟烏城克復束身

投見意實緩師總督復發兵逐安邊安氏以鹽倉授安其爵而進兵至望城坡遇賊哨騎百餘麾兵奮擊賊盡奔箐中遂復烏撒城安邊駐三十里外擁兵求見諭令束身歸誠邊乘夜遁遂棄鹽倉入九龍圍烏撒陷賊八年至是始平定乃召其爵來鹽倉令約束九頭目以守之且令獻安邊安氏以酬前言其爵以鹽倉殘燬乞移烏城從之時其爵署烏撒知府其祿署霑益知州雖懦弱頗忠順其母亦頗有主持能得衆以是稍安靜而安邊屢乞降於總督朱燮元且藉水西安位爲代申以邊實紹慶嫡孫宜襲知州請罪其爵其祿燮元曲爲調持欲予以職銜分

烏撒插置之雲南撫按堅執不可以安邊迫阿烈阿克反勒兵於野馬川復以千金賺誘其爵頭目布雄曰爲并吞霑烏計萬一其爵被襲則烏撒失而前功盡棄烏撒失霑益危而全滇動搖非但震鄰實乃切膚竟不行安邊乃乞師於安位納之霑益而逐其祿時安氏在也旣而安氏死安位與之貳邊岌岌不保其祿乃假手羅彩令者布發難邊遄死不移日其祿率兵至詭言爲其叔報仇士民歸者如流於是其祿復有霑益而廟堂之上方急流寇不復能問云

師範曰四土司舊隸于蜀而其地則錯乎滇黔楚之交勝國

時叛服無常攘取刦掠蓋如亂絲然至我朝雖少戢而犬羊之性終難全革鄂西林總制因其釁而薶薶之分設流官今東昭二府咸稱樂土屢有舉于鄉者文端之功不已較之咸陽黔甯而更偉哉

三



三

Vertical columns of faint, mostly illegible text, possibly bleed-through from the reverse side of the page. The text is arranged in several columns, with some characters being more distinct than others.

